

# KENYATAAN MEDIA



**KEMENTERIAN PERDAGANGAN DALAM NEGERI DAN HAL EHWAL PENGGUNA**  
No. 13 Persiaran Perdana, Presint 2,  
62623 Putrajaya

No. Telefon : 03-8882 5562  
No. Fax : 03-8882 5569

## **SYARIKAT DISYAKI MENJUAL PEMADAM API TIRUAN DISERBU PENGUAT KUASA KPDNHEP**

**PUTRAJAYA, 28 Januari 2022** – Bahagian Penguat Kuasa Kementerian Perdagangan Dalam Negeri dan Hal Ehwal Pengguna (KPDNHEP) telah melakukan serbuan ke atas sebuah premis yang disyaki membekalkan alat pemadam api disyaki tiruan di Petaling Jaya, Selangor pada 25 Januari 2022.

2. Operasi yang bermula pada jam 2.00 petang itu dengan kekuatan seramai enam (6) orang anggota penguat kuasa KPDNHEP Putrajaya yang diketuai oleh Ahmad Adli bin Mohammad. Serbuan dilakukan berikutan aduan yang diterima daripada wakil cap dagangan berdaftar yang berkaitan berhubung penjualan pemadam api yang disyaki tiruan ini.

3. Hasil maklumat risikan awal yang diperolehi mendapati, syarikat ini menjalankan perniagaan menjual dan mengedar alat pemadam api disyaki tiruan dipercayai untuk pasaran domestik melalui penjualan di premis perniagaan secara fizikal sekitar Lembah Klang dan secara dalam talian melalui platform e-dagang. Bekalan pemadam api ini juga dipercayai diimport dari Negara jiran.

4. Hasil pemeriksaan lanjut ke atas premis itu telah menemukan sejumlah **864 unit** pemadam api jenama berkaitan dan kesemua alat pemadam api tersebut bersama beberapa dokumen perniagaan disita untuk siasatan lanjut. **Nilai rampasan dianggarkan berjumlah RM 85,536.00.** Seorang lelaki tempatan berusia lingkungan 30-an yang mengaku sebagai pengurus syarikat terbabit ditahan bagi membantu siasatan. Hasil pengecaman awal oleh wakil pihak cap dagangan berdaftar itu juga mengesahkan bahawa kesemua produk tersebut adalah tiruan berdasarkan ciri-ciri yang ada pada pembungkusan dan produk itu sendiri.

5. Kes disiasat di bawah Seksyen 102(1)(b) Akta Cap Dagangan 2019 iaitu mana-mana orang yang menjual atau menawarkan atau mendedahkan bagi jualan apa-apa barang yang suatu cap dagangan berdaftar dipakaikan dengan salah.

6. Mana-mana orang yang melakukan kesalahan di bawah peruntukan undang-undang ini, jika disabitkan kesalahan boleh dikenakan denda seperti berikut:

- i. jika orang itu ialah suatu pertubuhan perbadanan, didenda tidak melebihi lima belas ribu ringgit bagi setiap barang-barang yang dipakaikan dengan salah cap dagangan berdaftar itu, manakala bagi kesalahan kedua atau berikutnya, didenda tidak melebihi tiga puluh ribu ringgit bagi setiap barang-barang yang dipakaikan dengan salah cap dagangan berdaftar; atau
- ii. jika orang itu ialah bukan suatu pertubuhan perbadanan, didenda tidak melebihi sepuluh ribu ringgit bagi setiap barang-barang

yang dipakaikan dengan salah cap dagangan berdaftar itu atau dipenjarakan selama tempoh tidak melebihi tiga tahun atau kedua-duanya, dan bagi kesalahan kedua atau berikutnya, didenda tidak melebihi dua puluh ribu ringgit bagi setiap barang-barang yang dipakaikan dengan salah cap dagangan berdaftar atau dipenjarakan selama tempoh tidak melebihi lima tahun atau kedua-duanya.

7. KPDNHEP ingin memberikan amaran kepada semua peniaga agar sentiasa mematuhi perundangan yang dikuatkuasakan termasuklah dengan tidak menjual barangan tiruan seumpama ini bagi mengelakkan dikenakan tindakan yang tegas di bawah peruntukan undang-undang ini.

8. Pengguna juga dinasihatkan agar sentiasa berhati-hati di dalam melakukan pembelian sama ada secara dalam talian ataupun di premis-premis fizikal agar tidak mudah terpedaya dengan taktik penjualan barangan tiruan ini serta tidak menyokong penjualan barangan tiruan kerana dikhuatiri boleh mengakibatkan kerugian dan menjejaskan keselamatan pengguna.

9. Sekiranya orang ramai mempunyai sebarang maklumat berhubung penjualan barangan tiruan ini boleh melaporkan kepada pihak KPDNHEP melalui saluran aduan berikut:

- i. WhatsApp 019-279 4317
- ii. Portal Aduan; e-aduan.kpdnhep.gov.my
- ii. Call Centre 1-800-886-800
- iii. Emel e-aduan@kpdnhep.gov.my
- iv. Ez ADU KPDNHEP

- v. Pusat Arahkan Penguatkuasaan (ECC)  
03-8882 6088/6245

**Bahagian Penguat Kuasa**  
Kementerian Perdagangan Dalam Negeri  
dan Hal Ehwal Pengguna  
**PUTRAJAYA**

**28 Januari 2022**

## LATAR BELAKANG

Kementerian Perdagangan Dalam Negeri dan Hal Ehwal Pengguna (KPDNHEP) telah ditubuhkan pada 27 Oktober 1990. Matlamat penubuhan Kementerian adalah untuk menggalakkan pembangunan perdagangan dalam negeri yang berdaya maju, berdaya saing, dan berdaya mampan, khususnya di dalam sektor perdagangan pengedaran.

Sektor perdagangan pengedaran adalah antara penyumbang utama KDNK negara dan ia bertindak sebagai benteng kestabilan ekonomi, terutama semasa situasi ekonomi luaran berada di dalam keadaan ketidakpastian. Perdagangan pengedaran perlu kukuh bagi menampai sebarang ketidakstabilan dalam ekonomi negara.

Dalam masa yang sama, Kementerian juga komited dalam melindungi kepentingan dan hak-hak pengguna. Ini termasuk membangunkan ekosistem pengguna dan peniaga yang bersifat melengkap dan ke arah *self-regulated*, seiring dengan aspirasi ke arah masyarakat negara maju. Ia diharapkan akan melahirkan pengguna dan peniaga yang matang dan beretika dalam berurusan niaga, dan hasilnya adalah negara yang seimbang dari segi ekonomi dan sosial.

Agensi di bawah KPDNHEP :

